

आकाशवाणी जयपुर—अजमेर

प्रादेशिक समाचार

- प्रदेश रा केई जिला मांय बरस रह्या जोरदार मेह ऊं केई जिलां मांय जिंदगी माथे असर पड्यो—मौसम विभाग जैसलमेर, बाड़मेर अर जोधपुर मांय जोरदार बिरखा सारू चेतायो ।
- विधि विभाग रा एक हुकम रा बारा मांय विधानसभा मांय हंगामो—सदन री कार्यवाही काल ताई टाळी ज्यी ।
- प्रदेश मांय हरियाळो राजस्थान—एक पेड़ मां के नाम अभियान रा तहत पौधा रोपण री तैयारियां ज़ोरां माथे ।
- तीजा वन सोमवार रे मौके आज शिवालयं मांय जातरूआं रो तांतो लाग्यो ।

000

प्रदेश रा केई जिलां मांय व्हे रह्या चोखा मेह रे कारण जिंदगी माथे असर पड्यो है । तेज बारिश ने ध्यान राखता थकां ब्यावर, नागौर, पाली, जोधपुर अर जोधपुर ग्रामीण जिलां मांय भारी बारिश री शंका ने ध्यान राखता थकां काल सगळी स्कूलां अर आंगनबाड़ी केन्द्रां रा सगळा विद्यार्थियां सारू छुट्टी रो ऐलाण कर दियो ज्यो है । कोटा, उदयपुर अर अजमेर संभाग मांय केई ठोड़ां घणी जोरदार बिरखा व्हे रही है । टोंक जिला रा नगरकोट गांव मांय सब ऊं बत्ती 321 मिलीमीटर बिरखा व्ही । जिला मांय काल ऊं व्हे रही तेज बिरखा रे कारण नदी—नाळां मांय पाणी उफण रह्यो है अर शहर मांय सड़कां माथे पाणी भर ग्यो है । जोधपुर मांय काल रात ऊं व्हे रही बिरखा रे कारण नीचला हलकां मांय पाणी भर ग्यो । अजमेर मांय ई काल रात ऊं व्हे रही बिरखा पाछे केई ठोड़ां पाणी भर ग्यो । जिला कलेक्टर

भारती दीक्षित न्यारा—न्यारा हलकां रो दौरों कर र हालात रो जायजो लीनो अर अहलकारां ने जरूरी हुकम दीना। पाली मांय व्ही ज़बरदस्त बारिश ऊं केई कॉलोनियां मांय पाणी भर ग्यो। जिला रा सोजत मांय 261 मिलीमीटर पाणी बरस्यो। बाड़मेर मांय ई आज सावन री झड़ी लाग गयी। भीलवाड़ा अर बूंदी समेत केई जिला मांय घणो ज़ोरदार मेह बरस्यो। बाड़मेर अर जैसलमेर मांय ई केई हलकां मांय चोखो मेह बरस्यो। जबरदस्त बिरखा रे कारण जैसलमेर जिला रा केई गांव अर ढाणियां जिला मुख्यालय ऊं कट ग्या है। लोहारकी गांव मांय बीजळी पड़ जावण ऊं 137 भेडां री मौत व्हे गयी। राजधानी जयपुर मांय ई आखा दिन रिमझिम बिरखा व्हेती रही। सवाईमाधोपुर अर बालोतरा ऊं ई बिरखा रा समाचार है। तेज बारिश रे कारण जोधपुर रा बोरानाडा थाणां हलका मांय आज तड़के एक कारखाना री भींत ढस जावण रे कारण 13 मजूर दब ग्या, ज्यां मांय ऊं तीन री मौत व्हे गयी। ज़ख्मी मजूरां रो जोधपुर रा एम्स अस्पताल मांय ईलाज चाल रह्यो है। पाली जिला मांय ई चोखो मेह बरस रह्यो है। भीलवाड़ा जिला मांय मेनाल रा झरना कने गोठ मनावण ग्यो एक जणो पाणी मांय बह ग्यो, जिण री तलाश करी जा रही है। सवाईमाधोपुर जिला मांय बनास नदी रा भारजा एनिकट कने काल बह्या एक जणा री लाश आज बरामद कर लीरीजी। जोधपुर डिविज़न मांय व्हे रही तेज बारिश रे कारण रेलों री आवण—जावण माथे असर पड़्यो है। मौसम विभाग आज अर काल केई जिलां मांय तेज बारिश सारू चेतायो है। मौसम केंद्र जयपुर रा निदेशक राधेश्याम शर्मा बतायो के जैसलमेर, बाड़मेर अर जोधपुर जिलां मांय घणी ज़ोरदार बिरखा रा आसार है।

00000

विधानसभा मांय आज विधि विभाग रा एक हुकम अर प्रदेश रा एक मंत्री रा बेटा ने अतिरिक्त महाधिवक्ता बणावण रा मामलां रो जिक करता थकां कांग्रेस रा विधायक हंगामो कीनो। सदन मांय विपख रा नेता टीकाराम जूली ओ मामलो उठाता थकां विधि विभाग रा सरकारी वकीलां री नियुक्ति ऊं जुड्या हुकम बेअसर व्ह्या सीआरपीसी रा तहत जारी करण रा बारा मांय सरकार ऊं सफाई देवण री मांग कीनी, पण स्पीकर वासुदेव देवनानी इण री मंजूरी नी दीनी। ई कारण व्ह्या हंगामा पाछे सदन री कार्यवाही पैली आधा घंटा सारू अर फेर काल

ताई टाळ दीरीजी। कांग्रेस रा विधायक मुकेश भाकर ने सदन मांय व्ह्या हंगामा रे दौरान स्पीकर री ओर गलत इशारा करण अर गलत व्यवहार करण रा आरोप मांय ई सत्र री बाकी कार्यवाही ऊं निलंबित कर दियो ज्यो। कांग्रेस रा विधायक सदन मांय धरनो दे रह्या है। विपख रा नेता टीकाराम जूली कह्यो के विपख रा विधायक आखी रात धरनो देवेला।

00000

प्रदेश मांय 'हरियालो राजस्थान—एक पेड़ मां के नाम' अभियान रा तैत 7 अगस्त ने हरियाली तीज रे मौके करीब दो करोड़ पौधा रोप्या जावेला। अभियान रा तैत डूंगरियां, चारागाह जमीं, सड़कां री कोर, स्कूलां, अमृत सरोवर अर पाणी रा स्त्रोतां कने पौधा रोप र प्रदेश ने हरयो—भरयो बणायो जावेला। जल संसाधन विभाग रा अतिरिक्त मुख्य सचिव अभय कुमार अर ग्रामीण विकास विभाग रा शासन सचिव आशुतोष ए टी पेडणेकर आज वीडियो कॉन्फ्रेंसिंग रे मार्फत सगळा जिला कलेक्टरां री मीटिंग ले र तैयारियां रो जायजो लीनो अर जरूरी हुकम दीना। मीटिंग मांय अभय कुमार कह्यो के ई अभियान रा तैत पौधा रोपण सारू जनता ने मुफ्त पौधा मुहैया कराया जावेला। ध्यानजोग है के राज्य रा बजट मांय मुख्यमंत्री वृक्षारोपण महाअभियान रे मार्फत 7 करोड़ पौधा रोपण अर वां री सार संभाळ करणो तय करी ज्यो है। एक पेड़ मां के नाम अभियान रा तहत कोटपूतली—बहरोड़ जिला रा कासली मांय खास कार्यक्रम राख्यो जावेला। इण री तैयारियां रो जायजो लेवण सारू आज जिला कलेक्टर कल्पना अग्रवाल अहलकारां सागे मीटिंग कीनी।

00000

तीज रे मौके 7 अगस्त ने जयपुर शहर मांय भरण वाळा मेळा ने ध्यान रखता थकां राज्य सरकार आधा दिन री छुट्टी रो ऐलाण कीनो है। ई मौके जयपुर मांय राज्य सरकार रा सगळा दफतरां, सरकारी उपक्रमां अर स्कूल कॉलेजां मांय आधा दिन री छुट्टी रेहवेला।

00000

पर्यावरण, वन अर जलवायु परिवर्तन मंत्रालय सभी संसद सदस्यों का एक पेड़ माँ के नाम" अभियान मांय बत्ती ऊं बत्ती भागीदारी सारू कागद लिख्यो है। पर्यावरण, वन अर जलवायु परिवर्तन मंत्री भूपेन्द्र यादव आज लोकसभा मांय एक सवाल रा जवाब मांय आ जाणकारी

दीनी। वे अभियान ने कामयाब बणावण सारू सगळा ऊं मिल र कोशिश करण री अपील कीनी।

0000

आज तीजो वन सोमवार है। ई मौके शिव मिंदरां मांय मोटी तादाद मांय जातरू पूग्या। जयपुर रा ताड़केश्वर महादेव, झाड़खंड महादेव अर दूजा शिव मिंदरां मांय पूजा—अर्चना करीजी। झुंझुनूं जिला रा लोहार्गल सूर्य कुण्ड मांय डुबकी लगा र जातरू पवित्र स्नान कीनो अर शिव जी रा मिंदर मांय जल चढा र पूजा अर्चना कीनी। सवाईमाधोपुर जिला मांय शिवाड़ रा घुश्मेश्वर महादेव मिंदर मांय सहस्त्रघट अर रूद्राभिषेक रा आयोजन राख्यी ज्या अर भजन संध्या राख्यी जा रही है। भरतपुर रा श्मशानेश्वर महादेव मिंदर मांय महादेव जी री झांकी सजायी ज्यी।

00000

विश्व स्तनपान सप्ताह रा तहत प्रदेश मांय न्यारा—न्यारा कार्यक्रम राख्या जा रह्या है। 7 अगस्त तांई मनाया जावण वाळा ई सप्ताह रा तैत सवाईमाधोपुर मांय जिला अस्पताल अर सगळा सामुदायिक अर प्राथमिक स्वास्थ्य केन्द्रां माथे प्रचार सामग्री रो दरसाव कर र जनता मांय ई बारा मांय जाग जगायी जा रही है।

0000

अर अब खबरां ओलम्पिक ऊं—

.....

पेरिस ओलंपिक रा 11वां दिन आज भारत रा बेडमिंटन खिलाड़ी लक्ष्य सेन पुरुषां री एकल होड़ मांय कांसा रा तमगा सारू खेल्या जा रह्या मुकाबला मांय आगे चाल रह्या है। वे मलेशिया रा ली जी जिया रे खिलाफ पहला सेट मांय 21—13 ऊं जीत हासिल कीनी, पण दूजा सेट मांय हार गया। आखिरी समाचार मिलण तांई लक्ष्य सेन तीजा सेट मांय ई पिछड़ रह्या हा। भारत री महिला टेबल टेनिस टीम रोमानिया ने तीन—दो ऊं शिकस्त दे र क्वार्टर फाइनल मांय पूग ग्यी। मणिका बत्रा वां रा दोन्यू मुकाबला जीत्या। श्रीजा अकुला अर अर्चना कामत डबल्स मैच मांय जीत हासिल कीनी। एथलेटिक्स मांय

महिलावां री 400 मीटर दौड़ मांय भारत री किरण पहल 52 दशमलव पांच—एक सेकंड रो समय निकाल र सातवीं ठोड माथे रही। निशानेबाजी रा मिक्स्ड टीम क्वालिफिकेशन रा दूजा राउंड मांय महेश्वरी चौहान अर अनंत सिंह नरुका 50 मांय 48 रो स्कोर बणायो। भारत री जोड़ी फिलहाल 97 अंक ले र छठी ठोड माथे है। महिला कुश्ती रा 68 किलोग्राम भार वर्ग रा प्री—क्वार्टर फाइनल मुकाबला मांय आज भारत री निशा यूक्रेन री टेटियाना रिज़्को रे खिलाफ उतरेला। पुरुषां री तीन हजार मीटर स्टीपलचेज़ रा पहला दौर री हीट—दो मांय अविनाश साबले चुनौती पेश करेला। पदक तालिका मांय चीन सोना रा 21, चांदी रा 16 अर कांसा रा 12 तमगा हासिल कर र अब्बल है। भारत कांसा रा तीन तमगा जीत र फिलहाल 57वीं ठोड माथे है।

00000

संचार मंत्री, ज्योतिरादित्य सिंधिया अर युवा मामलात अर खेल मंत्री डॉ. मनसुख मांडविया पेरिस मांय चाल रह्या ओलंपिक खेलां री यादगिरी रा तौर ऊं आज भाला फैंक, हॉकी, नौकायन अर टेबल टेनिस रा डाक टिकटां रो सेट जारी कीनो। नई दिल्ली मांय राख्यी ज्या कार्यक्रम मांय ई ओलंपिक मांय 10 मीटर एयर पिस्टल मिक्स्ड टीम होड़ मांय मनु भाकर सागे कांसा रो तमगो जीतण वाळा सरबजोत सिंह, स्टीपलचेज़ एथलीट सुधा सिंह अर पैली वाळा क्रिकेट खिलाड़ी आकाश चोपड़ा ई शामिल व्ह्या।

000